



Broj:13/1-14-21486/12
Dana, 28.08.2012.godine

Na osnovu člana 35. Zakona o izvršenju Budžeta Tuzlanskog kantona za 2012. godinu ("Službene novine Tuzlanskog kantona", broj: 3/12), Ministar zdravstva Tuzlanskog kantona d o n o s i:

O D L U K U

o utvrđivanju uslova, kriterija i postupka za raspored sredstava sa pozicije „Tekući transferi neprofitnim organizacijama“ za 2012. godinu

Član 1.

Ovom Odlukom utvrđuju se uslovi, kriteriji i postupak za raspored sredstava sa pozicije „Tekući transferi neprofitnim organizacijama“ za 2012. godinu, potrošačke jedinice 19010001- Ministarstvo zdravstva Tuzlanskog kantona (u daljem tekstu: **Ministarstvo**).

Član 2.

Sredstva iz člana 1. ove Odluke dodjeljuju se neprofitnim organizacijama (u daljem tekstu: Organizacije) i udruženjima koja su registrovana u Ministarstvu pravosuđa i uprave Tuzlanskog kantona, kao i organizacijama i udruženjima koja su registrovana u skladu sa zakonom na entitetskom ili državnom nivou, a koja imaju sjedište, djeluju, rade i implementiraju projekte na području Tuzlanskog kantona (u daljem tekstu: Kanton).

Član 3.

Sredstva za programe i projekte organizacija i udruženja iz člana 1. ove Odluke dodjeljuju se na osnovu javnog poziva Ministarstava.

Član 4.

Sredstva planirana u Budžetu Kantona za ove namjene, raspodjeljuju se prvenstveno neprofitnim organizacijama i udruženjima čiji se programi i projekti odnose na:

1. organizaciju akcija dobrovoljnih darivanja krvi na terenu,
2. edukaciju osoba sa pervazivnim autističnim razvojnim poremećajem, i
3. organizaciju odnosno sudjelovanje na organizovanim oblicima stručnog usavršavanja u oblasti mentalnog zdravlja, koji se događaju na području Tuzlanskog kantona.

Raspoloživa sredstava, između programa/projekata pod rednim brojem 1. i rednim brojem 2. i 3., se raspodjeljuju u omjeru da iznos sredstava za programe /projekte po rednim brojem 2. ne prelaze 10%, odnosno za projekte pod rednim brojem 3. ne prelaze 20 % ukupnog iznosa iz tačke 1. ove Odluke.

Prilikom procjene neće se razmatrati programi i projekti koji:

- su usmjereni ka vjerskim ciljevima i aktivnostima,
- se isključivo baziraju na investicijskim ulaganjima, izgradnji i adaptaciji objekata, kupovini opreme,
- imaju administrativne troškove na projektu veće od 30% troškova ukupnog budžeta projekta.

Član 5.

Ministarstvo sačinjava prijedlog Programa raspodjele dijela sredstava cijeneći slijedeće kriterije:

1. obuhvaćenost osoba programom/projektom,
2. broj učesnika na organizovanim oblicima edukacije.

Član 6.

Javni poziv iz člana 3. ove Odluke objavljuje se na zvaničnoj Web stranici Vlade Kantona, www.vladatk.kim.ba.

Obavještenje o objavljenom javnom pozivu se objavljuje u dnevnim novinama i RTV TK.

Prijave na javni poziv dostavljaju se u roku od 10 dana od dana poslednjeg objavljivanja javnog poziva, odnosno obavještenja o objavljenom javnom pozivu.

Član 7.

Organizacije i udruženja podnose prijavu na javni poziv tako što popunjavaju Prijavni obrazac koji čini sastavni dio ove Odluke.

Uz Prijavni obrazac obavezno se prilaže :

- Rješenje o upisu u Registar kod Ministarstva pravosuđa i uprave Tuzlanskog kantona ili drugog nadležnog organa u Federaciji Bosne i Hercegovine ili Bosni i Hercegovini [sjedište udruženja na Rješenju je na područja Tuzlanskog kantona] (orginal ili ovjerena kopija),
- Uvjerenje o poreznoj registraciji (orginal ili ovjerene kopija),
- Spesimen potpisa (Karton deponovanih potpisa) iz banke osoba odgovornih za finansije u udruženju ili kopiju ugovora s bankom o otvaranju transakcijskog računa [ugovor sadrži ID broj udruženja i imena osoba ovlaštenih za finansije u udruženju] (original ili ovjerena kopija);
- Detaljan program ili projekat za koji se traže sredstva;
- Finansijski plan projekta s izvorima prihoda i očekivanim rashodima;
- Specifikacija troškova za koje se traže sredstva tekućeg granta.

Prijavni obrazac se može preuzeti na Web stranici Vlade Kantona (www.vladatk.kim.ba) ili na pisarnici zajedničkih službi kantonalnih organa.

Prijavni obrazac se podnosi zajedno sa propisanom dokumentacijom u zapečaćenoj koverti, a predaje putem pošte ili na pisarnicu zajedničkih službi kantonalnih organa.

Član 8.

Prijave na javni poziv koje ne budu dostavljene u skladu sa članom 7. ove Odluke neće biti razmatrane.

Prijave na javni poziv koje pristignu nakon ostavljenog roka iz člana 6. stav 3. vratit će se pošiljaocu i neće biti razmatrane.

Prijave na javni poziv, korisnika sredstava iz 2011. godine sa pozicije "Tekući transferi neprofitnim organizacijama" koji nisu dostavili odgovarajući izvještaj o utrošku sredstava u skladu sa potpisanim ugovorom, neće biti razmatrane.

Član 9.

Ministarstvo će u roku od 20 dana od dana donošenja ove Odluke provesti javni poziv, te sačiniti Program raspodjele sredstava. Na Program raspodjele sredstava saglasnost daje Vlada Kantona.

O programima / projektima koji su odbijeni, u roku od 15 dana od dana donošenja Programa iz stava 2. ovog člana, Ministarstvo je dužno pismeno obavijestiti podnosioca zahtjeva uz obrazloženje razloga zašto je program/projekat odbijen.

Član 10.

U roku od 7 dana od dana davanja saglasnosti iz člana 9. stav 2., ministarstvo zdravstva zaključuje ugovor sa organizacijama i udruženjima o sufinansiranju programa/projekta, kojim će se regulisati međusobna prava, obaveze i odgovornosti.

Član 11.

Ministarstvo podnosi Vladi Kantona izvještaj o realizaciji sredstava iz Budžeta Kantona, sa pozicije „Tekući transferi neprofitnim organizacijama“ za 2012, namijenjenih organizacijama i udruženjima po javnom pozivu za 2012. godinu, kojeg sačinjava na osnovu pojedinačnih izvještaja korisnika sredstava.

Izvještaj se podnosi u prvom kvartalu 2013. godine.

Član 12.

Odluka stupa na snagu danom donošenja i bit će objavljena u “Službenim novinama Tuzlanskog kantona”.

M I N I S T A R

Prof.dr.med.sci. Nada Pavlović-Čalić